

## CAPITOLO III

### POESIE SCHERZEVOLI

## NOZZI D'ORU

Quannu li nonni mei si maritaru  
S'imbarcaru pi lu viaggiu di nozzi,  
Lu primu albergu chi si risittaru,  
Subitu misuraru li sò forzi.  
Lu nonnu avìa vint'anni, era picciottu,  
Tutti li brisculi li finìa di bbottu.

Dopu cinquant'anni maritati,  
Vosiru li nozzi fistiggiari,  
Li settant'anni eranu sunati,  
Li brisculi cuminciaru a difittari.  
A la ricurrenza supra lu cutruni  
Pi cummemurari lu primu brisculuni!

Lu nonnu stancu, tuttu sudatu,  
Ci dici la nonnina: Dai! Dai!  
Sutta lu tuccau, era vagnatu:  
Peppi accussì prestu, comu mai?  
Bricida li carti nun mi passaru,  
Chistu nunn'è vagnazzumi, mi cacai!

## LU SCULUNI

Passava un omu pi la strata,  
Cu la sò testa china di pinseri,  
Lu suli era curcatu, a la scurata,  
Caminava supra u marciaperi,  
Quannu nta lu pettu di lu giacchittuni,  
Si senti arrivari un gran sculùni.

Si ferma a stu sculùni, lu talia,  
Lu guarda attentamenti, ci fa casu,  
A primu acchittu scarcu ci parìa  
O qualcuno chi si ciuciau lu nasu.  
L'occhi versu supra si suspìsi,  
Vitti na cuppietta e si riprìsi.

Guarda lu balconi e la firrata,  
C'era na gran fimmina baffuta,  
Un picciuttazzu chi l'avìa abbrazzata,  
S'avianu fattu na guduta.  
D'omu rifletti e si riprìmi,  
Unn'è scarcu, unn'è morvu, unn'è saimi.

Tuppulìa sutta, nto purtuni,  
Affaccia na signura e so maritu,  
Dumanna: Cu c'è nta stu balconi?  
C'è me figghia e lu sò zzitu.  
Maritu e mogghi attentanu alluccuti:  
Cca mpettu haiu a vostru niputi!

## LU SPURTIVU DI PALLUNI

Tu, chi s'ì spurtivu di palluni!  
Cu sunnu li purteri, cchiù famusi?  
Zoff, Cudicini, Albertosi,  
Sarti gran celebri campioni!  
Mi dispiaci, si spurtivu e nun lu sai,  
Chisti su purteri fori fasi,  
Infatti la palla, spissu, trasi,  
Si vinci o si perdi, nun si sa mai.

Nta la porta, mettici na donna,  
La partita nun si perdi cchiui,  
Basta isari la punta di la gonna,  
Li palli vi li para a dui a dui.  
Ci striscianu, ci sbattinu, ci fannu lu rimbummu,  
Lu centru avanti diventa un parassita,  
Chianci, lacrima, perdi la partita!

## LU BAGNU A PIPPINEDDU

La mamma usava a Pippineddu,  
Chi ogni Duminica, ci facià lu bagnu.  
Ci partìa di la testa a lu carcagnu,  
Spaddi, panzutta e culiceddu,  
Quannu c'insapunava la pipìa,  
Si cattigghiava, tuttu chi rirìa.

Mamma, t'innadduni comu fà?  
Quannu mi strufini a sapunetta,  
Diventa dura, pari chi t'impetta,  
Cchiù chi la tocchi, cchiù mi sta a bungìa.  
Ci dici la mamma: È na trummetta,  
Chi ciucia, sona e puru fa ballà,  
Quannu poi, si attu a maritari,  
Sona comu a chidda du papà!

Mamma, tu cu mia, nun si sincera,  
Nun sona, nè dritta e mancu storta,  
L'otra vota di la ngagghia di la porta,  
Virìa u papà e la cammarera;  
Cci mittìa mmucca, la trummetta,  
Cu la manu l'allisciava tutta,  
Cu la vucca la sucava svelta,  
Ma avogghia chi ciuciava e chi sucava  
Invece di sunàri, vomitava!

## LU TURISTA

Lu turista chi gira pi lu munnu  
Nni cunta nta li Nazioni chiddu chi fannu:  
In Germania pi la meccanica nun c'è funnu,  
In Svizzera pi l'ossigginu chi hannu,  
In Somalia pi li banani chi ci sunnu,  
In Russia c'è la nivi tuttu l'annu,  
In Italia ch'è un luogo di sapienti,  
Unu travagghia e deci fannu nenti.

## L'UNIVERSITA'

Cummari, vostra figghia comu stà?  
Beni! Cummari mia, nun c'è cchi di,  
È a lu primu annu d'università,  
Parti ca firruvìa, ogni lunedì.  
Povira figghia, è sula, stà ncità,  
Dda va trova u figghiu di Don Fifi.  
Secunnu li reguli di la grammatica,  
Sturianu nzemmula, scienzi e matematica.

Chi bravura, nun haiu chi dirivi e cuntari,  
Comu è veru chi existi Diu a stu munnu,  
Si cci dunanu un gattu di pilari,  
Vi sannu diri quantu pila sunnu.  
Matematica stritta e mpirugghiusa,  
Cuntabilizzari na peddi assai pilusa!

Na vota, cu Peppi Naca, a primu bancu,  
Tiraru na summa a lu disbrigu,  
Quantu pila pò aviri un rangu tangu,  
Spaccaru lu centru, la virgula, lu rigu!  
Ma comu fannu? Ci dicìa so nannu.  
S'allenanu, di lu rinocchiu a lu biddigu,  
Si cuntanu nsemmula, quantu pila hannu!

## LU ADDU DI LA FATTURIA

Un grossu addu di la fatturìa  
Cantava, currìa, pigghiava volu  
E arrivatu sutta a un vistiolu,  
Taliannuci sutta la panza lu sfuttìa.  
Coddu tisu, occhi spalancati  
E si futtìa di li gran risati.

Ci dissi lu vistiolu: Chi hai di diri?  
Nenti, viu chi si stupendu,  
Si grossu, autu, pari un munumentu.  
Pi chissu mi sfutti e ti nni riri?  
Lu addu ci rispusi: Sugnu alluccutu  
Chi hai li granni bocci e s' curnutu!



## P'AVIRI UN POSTU

Un omu abbastanza spiritusu,  
Vulìa pi forza, essiri mpustatu,  
Appressu i Diputati nsupra e gghiusu,  
Circannu minsili sistimatu.  
Sua Eccellenza, essennu capricciusu,  
Ci dissi: Ti fazzu sistimari,  
Nun disidiru sordi, nè prighieri,  
Vogghiu pi na simana, a tò mugghieri!

Subiti lu spustatu, chi pinsau,  
Capita di bottu, na picciotta,  
Cunvinni lu prezzu, la pagau,  
Era na bedda figghia, un po chinotta.  
Quannu Sua Eccellenza, l'acchicchiau,  
Sulu a vidirla ni pigghiau na cotta,  
Prestu la pigghiau pi la manu,  
Sbagnau la pultrona e lu divanu.

Ambi li parti senza cchiù rammaricu,  
La cosa fu d'accordu e predisposta,  
Prestu si furmau lu novu organicu,  
Si fici la nomina e si mposta.  
Dopu fattu lu mbrogghiu è cosa umanicu,  
Chi la cosa savìa a sapiri,  
Rrivau la festa di Misteri,  
Lu mpiatu scinnù cu la mugghieri.

Mmezzu di la fudda, cu va penza,  
Chi si va duna la fatalità,  
Li spusi ncuntrararu a Sua Eccellenza;  
Prisentu me mogghi è chista ccà.  
Allura chidda nunn'era tò mughieri?  
Dd'omu ci cuntau la virità.

Sua Eccellenza stesi a replicari:  
Lu pattu è pattu e savi a rispittari!  
Sua Eccellenza nun putìa cchiù sparari,  
Pinzannu cci vinìa l'abìli,  
La cucotta lu stesi a riformari,  
Ci fici na parti assai ncivili,  
Nun sulu lu purtau dunnì vosi,  
Ci danneggiàu puru lu fucili.

## LU CAPILLUNI

Un diplomatu facià lu cagnulinu  
E ci mannau na picciotta schetta,  
Sua Eccellenza, virennu dda faretta,  
La porta detru stanza, ncammarinu.  
Prestu li cunnutati ci pigghiau,  
Firmau lu dicretu e ciù calau.

Si tu voi lu postu, fà lu stissu,  
Mannaci puru na signurina,  
Scegli na cosa bbona, di vetrina,  
Nsisti puru, mannaccilla spissu.  
Basta mustrari sulu li gammuzzi,  
T'imposta, facenu puru li scarpuzzi!

Un tali ci mannau un capilluni,  
Vistutu di na bedda signurina,  
C'avìa un marruggiu sutta la vistina,  
Grossu quantu un occhiu di zappuni.  
Stu capilluni appi puru u postu,  
Ci cura a sua Eccellenza u cuntrapposto!

## LA SIGNURA E LU PAPPAGADDU

Una Signura avìa un pappagaddu  
Chi un beddu iornu ci carìu malatu,  
Ci dissi lu dutturi: Ci voli aria!  
Dintra ci manca e stà accupatu!

La Signura pigghiau pruvvidimenti,  
Parlau cu diversi cuntadini;  
Subitu lu portanu ncampagna,  
Nto mpullaiu mmezzu li addini.

Nta lu pullaiu c'era puru un gaddu,  
Chi spissu facià lu Don Giovanni;  
Si passau nta na para di iorna,  
Tuttu li addini, nichì e granni.

Finutu, lu gaddu chi pinzava  
Putirisi passari u pappagaddu!  
Currìa, cc'ia d'appressu, svulazzava,  
Si cci vulìa mettiri a cavaddu.

Ci dici lu pappagaddu: Chi voi fari?  
Pensaci supra, nunn'essiri fucusu!  
Iò vinni cca pi canciamentu d'aria,  
Nun vinni pi tu farimi arrusu!

## L'EPUCA È CANGIATA

Na signurina ntrenu, murmurava:  
Eh, ora li cosi sù cangiati!  
Li vicineddi ch'eranu assittati,  
Ogn'unu curiusu, la guardava;  
E la signurina di novu riplicava:  
Eh, ora li cosi sù cangiati!

Di l'accentu parìa napulitana.  
Un'omu ci dissi: Soccu aviti?  
Eh, amicu meu, vui nun sapiti!  
Ncasa mia c'è na cosa strana,  
Cu dui figghi fimmini chi haiu,  
Una schetta e l'otra maritata,  
Capitaru nta lu stessu guaiu.  
Parlannu ncunfidenza, cca, fra nui:  
Mè figghia maritata, figghi unn'havi,  
Inveci chidda schetta, nn'havi dui!